

MUNYENKOMEZI

Duc Authentique



MUNYENKOMEZI

Duc Authentique

© Copyright 2022— Duke Stories

Uburenganzira bwose burabitswe. Ntivyemerewe kugira kopi, gusohora canke gukoresha ukwarikwo kwose mu ntumbero yariyo yose iyi nkuru utabiherewe uruhusha n’umwanditsi nyeneyo ubwiwe.

Iyi nkuru irora ukuri kw’ubuzima bwa misi yose, ikaba yanditswe mu buryo bwo kwinezereza igamije kwigisha, guhanura no gukebura ikibano n’abantu muri rusangi.

Iyi nkuru hamwe n’izindi nkuru zose zanditswe n’umwanditsi Duc Authentique, urashobora kuzironka zose vyoroshe kuri page yiwe ku rubuga hwaniro Facebook.

Edited by Duc Authentique

Cover design: Duc Authentique

Youtube Facebook Instagram Tiktok: Duc Authentique

Whatsapp: (+257) 71349267

Gmail: duccendrars@gmail.com

Ebook published by Duke Stories®

Bujumbura, Burundi

1

Nitwa Uwingabiye Jane mfise imyaka mirongo itatu n'itandatu mba mu gihugu hagati nkaba mfise umwana w'umukobwa nkunda cane yitwa Bwiza Prielle afise imyaka cumi.

Ndi umudamu yigenga yidegemvya nshatse kuvuga ko ntari ku mugabo, nkaba ndumuganga muri bamwe dukunze kwita abaforoma, kwivuriro ryigenga ry'intara ndimwo.

Ndumudamu Imana yangiriye ubuntu nubwo mfise imyaka yitereye imbere gatoya ariko abantu benshi mbwira imyaka mfise ntibayemera kubw'ukwo mfise akabiri kagitotahaye ubwiza bukwega imisore ikiri mito ndi nabwo aho buri musi ntahengeshanya gutangazwa no kubona imisore yiga za kaminuza buri musi insaba inimeri za terefone ngendanwa yanje.

Mushobora kuba mutanguye kwibaza ibanga nkoresha ariko ndaje ndaribabwire kuko nico kinzinduye uyu musi ncuti zanje mwavyukiye kuntiza amatwi yanyu meza kugira dutere ryarenga duteramire kwiri shure ry'ubuzima.

Ubuheruka nafashe akaruhuko k'akazi ndonka buri mwaka maze nari nakoze ibishoboka vyose kugira ndakaronke mu ci Prielle ari mu buruhuko aho twatekeye ivyangombwa bike bishoboka kugendera mukavazize gato maze tumanuka I Bujumbura inyuma y'imyaka itari mike ndahateye umugongo.

Umwaka nava I Bujumbura mu vyo nateganya kwari ukugenda ubutakigaruka ariko ibihe biha ibindi napanze kuja kuruhukirayo ntitaye kuri kahise ndahafise.

Ndababwiye ko ariyo mvuka murashobora gutangara kuko inyuma yiyo myaka yose sinigeze ndahahonyoza ikirenge kandi Data na Mama na bamwe mubo tuvukana ariyo baba ndetse novuga ko n'abagenzi banje ba kera ariyo bari ariko ibihe vyangobereye guhindukiza urupapuro rw'ubuzima nkasiga inyuma kahise ndetse nkahanga amaso imbere.

Umwanzuro nafashe wankuye ibuzimu ukangarukana ibuntu, umwanzuro nirata buri gitondo iyo mpejeje kwitegura no gukora makeup itarengeje nkipompa agaparfum kamota neza maze nkiraba mukiyo kinini kiri kumwango wa garde robe yanje nkaraba umugore mwiza mbonamwo ingene ahagaze yemye ateye amabengeza akomeye cane kurusha ukwo yigeze.

Nakwibuka ko igihe kimwe nigeze kwandavura hasi nandavujwe nuwo nari narahuye nawe niteze gutemberezwa muri ya si iruta izindi ariko akanjana muyihushanye nazo, bintera gushima no kuririmba indirimbo Tagata ya Emerysun.

Jewe na Prielle twagiye gufata bus itumanukana aho atari agaseseshwarumuri umukobwa wanje yari yishimiye bidasanzwe kuba yamanuka I Bujumbura aho yaraye ntibuca ashuhiye ibintu vyinshi yahora yumva bavuga kuri co gisagara benshi baturumbira kuko kuri bamwe gitanga icizere c'ubuzima yamara kubandi kigatanga ukwiheba.

Nari nashimye kudashoka nja kuramukanya mu muryango kubw'umutekano wanje ndetse no kugira mbanze nryohererwe akaruhuko kanje maze mpitamwo kuja muri hotel nziza yegereye ikiyaga Tanganyika abariho dushikira n'umukobwa wanje Prielle muri gahunda kwari ukuzoja kuramukanya mu ndwi yanyuma tugira dusubire inyuma.

Bica vyumvikana ko atamuntu numwe nahaye amakuru y'urwo rugendo, aho twashitse baduha icumba kimwe co hejuru maze turoga turihindura twambara impuzu zo kwirekura na cane cane ko ubushuhe bw'I Bujumbura ntari ndabuherutse kuri Prielle we vyabaye ibindi.

Twahagiriye ibihe vyiza jewe n'umukobwa wanje Prielle, buri gitondo twavyuka bukeye maze nk'umuco nari naramutoje kuva mu buto twaricara turabana maze tugafatana mu biganza tugasenga tugashimira Umuremyi kuwundi musu utekeye amabanga itwongeye maze tugasaba umutima wo kuza gushima buri kimwe iza kudukorera ndetse no kuza kuba inyangamugayo kurusha kandi tugakomerera ivyoshika tutoshobora guhindura.

Inyuma yo gusenga twarafata imfungurwa zo mugatondo ku rutonde rwari ruri mucumba twarimwo aho twahitamwo ico dushaka maze tugakora ku rutsinga tukagira commande mukanya gato bikaba biradushikiriye kuko service zaho zari zibangutse kuko zari zinazimvye uretse ko ikibazo c'amafaranga kitankoma na gato kuko nari maze umwaka nziganiriza ivyo bihe.

Mushobora kwibaza ko nonona amafaranga ariko kuriye ntikwari ukwonona ariko kwari ukwiriha ibihe namaze mu bucakara ntazi-

kuryoherwa ingene bimeze kuko buri gihe natwenga nigrishije kugira nirinde ibibazo vyabantu.

Twe na Prielle buri musu twaba twapanze ivyoyu tuza gukora aho twagira sport tukagira natation tukagira meditation tugetembera ndibuka ko namujanye muri musé vivant akaryoherwa no kubona ibikobo bitandukanye atari bwabone.

Ntakintu canryohera nko kwoga Tanganyika hanyuma nkaryama ku dutanda twa turi kunkengera nambaye amarori yizuba ryanje maze akayaga kagahuha nkumva bumwe bita ubuzima butagabanije.

Ndavyibuka ko umusi umwe nariko nicaye ku nkengera ndiko ndasama akayaga mfise aga carnet kanje nandika utuntu nutundi naba numva nkwiye kuba nakwandika kugira sinzokwibagire kuko nkuko bivugwa amajambo tuvuga agurugwa n'umuyaga yamara ayo twandika ahoraho iteka ari nayo mpamvu ibihe vyiza canke ivyigwa vyose niga mu buzima naravyandika mu gacarnet kanje kugira ngo nivyashika nkanibagira kuko ndumuntu nzokwiyibutse.

Murukwo kwandika sinzi ukuntu nunamuye umutwe haruwo nakubise amaso numva umutima uteye insigane umubiri urasuhurwa ndetse numva umushatsi hafi kumvako...

2

Ariko hachiye akanya nibajije impamvu ndiko ndaba umunyantegenke mu gihe nari nararahiriye kuba umunyankomezi vyaguma vyorooha numva ntakwiye kureka nkabandanya ntsindwa nca ndavuga nti: “ntampamvu yo kugira ubwoba kuko kuriyi ncuro ndakomeye kandi meze neza kandi amahoro yanje umunezero wanje n’umutekano wanje nibwo butunzi mfise ntakwiye kureka umuntu numwe akabunyaga nanje ubwanje ntaburenganzira ndabifitiye.”

Natanguye kuvugira mu mutima nti: ‘‘Non Jane! T’es forte tu le sais! Plus forte que tu ne le penses! ’’

Nafashe ndahemuka maze mumasegonda make umutima uratekana utera bisanzwe aho amaso yanje burukwo nunamuka nkayahuza na James kuko yaguma andaba aho yari yicaye hirya nanje nahisemwo kumwihoza nkikomereza ubuzima kuko yari mu nkuru ya kahise ntateganya gusubira gusoma canke kubandanyiriza aho nayigarukirije.

Ariko we ntiyahengeshanyije kundaba kuko nawe yari yicaye wenyene maze birangira ampepeye ikiganza aho ubwambere namanje ndahindukira ndaba inyuma yanje kugira ndabe ko vyukuri yoba ari jewe apepeye ariko mbuze umuntu inyuma nanje nduza ikiganza canje ndamupepera naho ntarinzi impamvu yo kumpepera kwiwe.

Ntivyahereye aho kuko hachiye akanya numvise imirindi y’intambuko z’umuntu aza angana maze nsubiye kwunamura umutwe mbona ni James numva ndagize amakenga.

Yaranshikiriye mbona yitwengesha nanje nk'umunyenkomezi yiyemera ndamwenyura gatoya ashika ampereza ikiganza ati:

“Mbonye wicaye uri wenyene nanje nkaba nicaye ndi jenyene nibwira ko noza tugateramana umusi ukaba urisuguma”

Jewe nti: “Ohh! Okay! Urisanga!”

Nawe ati: “Usanzwe ukunda kuza guteramira hano hantu nawe?”

Jewe nti: “yes! Sometimes!”

Nawe ati: “Nico gituma usa neza biraboneka”

Jewe nti: “Merci”

Nawe ati: “Harya bakwitwa nde?”

James yambajije ingene nitwa numva ndatangaye ndetse ku buryo nawe nyene yabibonye ko bintangaje cane acarambwira ati: “Pardon! Ntiwibaze ngo ndi babandi babashaka kugutesha umwanya nje mumahoro kugira tuganire gusa mukobwa mwiza yahezagijwe na Rurema ubwiza yimye abandi!”

Je ku mutima nari numva urusobekerane rwibibazo nti: “Aha vya kueli James ntakinyibuka canke ariko arigirisha?”

Siniyumvisha ukuntu umuntu yokwibagira umuntu yamenye kurusha abandi akamumenya no mwibanga hahandi hashika imparurwa hamwe uba warahevyeye vyose kugira uhisangane nuwo muntu watoranije mu majana menshi yabantu.

James yarabandanije ati: “Uriko urandika uduki none ngo nanje utunsangize?”

Jewe nti: “Hmm! Uri sûr ko ushaka ko ndagusangiza?”

Nawe ati: “Cane! Ndakwinginze untere iryo teka maze amatwi yanje asome ku mateka yawe ntakekeranya ko aza kugira aho ankuye naho anshikanye”

Neza na neza nabandanije kwumizwa no kubona James adashobora no kumenyera mwijwi basi nubwo nari narahindutse ariko sinibaza ko vyogera hiyo.

Natanguye kubwira James nti: “Amazina abavyeyi banyise sinshimye kuyakubwira ariko reka ndakubwira izina niswe n’amateka yanje, nitwa Munyenkomezi nakomeye mbanje gukomererwa nkomera kugira nzokomeze abandi bazokomererwa nkuko nanje nakomerewe nuwari yaremewe kunkomeza”

James yunzemwo ati: “Hmmm! Ko bikaze ra?”

Jewe ntwenga bukebuke nti: “Birakara ntaratangura?”

James yakweze agatebe aricara ampanga amaso ati: “Ngaho mbwira uwo mujinga yubahutse gukomeretse umuziranenge nkawe jewe noheba vyose kubwawe canke undangire ahari ngende ndamumerere nabi jewe”

Ataraheza nunganiyemwo ntwenga nti: “Hhhh! Oya ntibikenewe ntampamvu yo kwicapfuriza ubusa kuko hariho abantu batari banakwiye ko tubacisha muvyiyumviro vyacu, uretse ko ndanamwipfuriza amahirwe masa, amahoro yose umunezero utagabanije mbere ndanashima Imana yampuje nawe kuko iyataba we simba narabaye uwo ndiwe uno musi, na hamwe Imana yonsubiza inyuma ikambaza ukwo nshaka kubaho

nohitamwo ukwo nabayeho kubera nabanje mbaho ukwo ntashaka kugira nshikire kuba uwo nshaka’’

James yishuye atangaye ati: ‘‘Hmm! Uwo muntu ko akaze none yoba ari nde?’’

Jewe nti: ‘‘Ntawundi rega Atari...

3

Namubwiye nti: “Uwo muntu rega nta wundi atari uwo namenye niga muri kaminuza maze akantwara umutima n’umubiri ndetse bikarangira akabuto kiwe karitse mu mubiri wanjye maze kakamukako umukobwa mwiza ariko akinira hariya kukimvuma”

James namutungiye urutoki hirya ahantu Prielle yariko akinira ku ma balançoire aramuraba ati: “waoh c’est ta fille?”

Jewe nti: “C’est la prunelle de mes yeux”

Nawe ati: “Elle est adorable !”

Jewe nti: “Merci! Ico gihe umuhungu ntabushobozi yarafise bwo kuntunga ngo anshire mu rugo ariko kubera urukundo namukunda nemeye gusaba amafaranga muhira kugira ngo dushobora gutegura ubugeni muhira nabo barankundira barayaduha maze tunakora ubugeni bwiza aho nibuka ko muri salon uruhome rwari rutatse amasanamu meza yari yafashwe kuruwo musu wari hejuru yiyindi”

Ndabandanya nti: “Nari numva ko igihe cose nzoba mbanye nuwo nkunda akabisi katazondurira nzokamira mukurindira agahiye”

James ati: “Umukobwa w’umutima disi”

Nanje nti: “Nava mumuryango ataco ubuze, ndetse kuva nakura sinari narigeze mbura icayi camata n’umukate usize mugitondo sinari narigeze ngenda namaguru urugendo rurerure, ubwo n’ubuzima bushasha vyabaye ngombwa ko niga umusi mfata icemezo co gukurikira uwo numva umutima wanjye uterera buri musu”

James yakomeza kwongeramwo ati: “Mbega urukundo we!”

Narabandanije nti: “Inkomezi ziva ku rukundo ntabwo ziva ku muntu ziva ku Mana kuko niyo Rukundo nyakuri, nanje sinabishobojwe n’ubuhinga ariko narabishobojwe”

James ati: “Ni ukuri gutambuka”

Jewe nti: “Gucishwa muziko ntigushe! Kubera mu muryango wanje bari abantu bifise kandi bamenyana n’abantu bakomakomeye abavyeyi banje barafashije bikubita hirya nino kugira ngo baronkere akazi uwo muganji wanje maze nawe yiyambika agashambara narirya yari arembejwe namenyo yabatwenzi atahengeshanya kumubwira ko ar’umugabo wa ntakigenda kubera yarongowe n’umugore”

Jamwe ati: “Basi abantu siko babaye bihuta kuvuga nabi gusa”

Narabandanije nti: “Imana igira neza inyuma yigihe umugabo yararonse akazi keza ndetse turavuga tuti ahwi! Nanje ndiruhutsa nanyarirya gushika aho twari dutunzwe numushahara wanjwe nahembwa mubuforoma, nahembwa umushahara wa diplome ya A2 nari nararonse muri paramedical kuko université nari nayiciriye hagati ndavugaga nti ‘ubu nanje ngiye gusubira kumera neza nkabandi bagore nshobore kwigurira agatenge nagakanzu keza ko kujana gusenga nisige utuvuta tumfate’ kuko nari nsigaye nteye ikigongwe abantu barandaba bakifata ku munwa”

James yatanguye kundaba cane adahunyiza nanje ndabandanya ndamugira ku muriri nti: “Kubera ko tutari dufise ubushobozi nava kukazi bikaba ngombwa ko nshika ndondera ivyo dufungura nkakora isuku nkamesa impuzu zanje nizumugabo kuburyo naryama ntevyeho naho nyene nagira ngo ndatoye agatiro umukobwa wacu nawe bukaba burakeye

mugatondo navyuka nkirushe kuburyo niyoga mpunyaguzwa nkitegura vyo gucishako nkaja ku kazi.

Ndibuka igihe kimwe nari muri bloc operatoire aho nariko ndafasha umuganga yariko arabaga munyuma kubera umunaniro mwinshi ndibuka aho natemvye nkata ubwenge ico gihe muganga aca ansabira akaruhuko.

Sinshobora kwibagira ijoro rimwe na...

4

Narabandanije ndamubwira nti: “Sinokwibagira ijoro rimwe, umugabo yari yararonse akazi mbere numwisho wari wageze kuko bari babatangarije kukazi ko amafaranga yamaze kuja kuri konte aho yari inkuru nari nishimiye bimwe bitovugwa kubera jewe ntamahera nari nsigaranye narimumadeni atagira izina.

Umwana wacu yari yirirwanye ubushuhe niriwe ndahendahenda ndamushira agasume gakanye muruhanga kuko nari ndindiriye umugabo azane amafaraanga tuje kumuvuza ariko mbonye ijoro ritanguye kwijima nifatira umwanzuro wo kumujana kwamuganga mudufaranga nahise ndasaba kwibutike batumpa bigoranye.

Ndavyibuka ko natashe murukerera ntanganzwa no gusanga hakicugaye ndugurura ndinjira umugabo wanje natanguye kumuhangayikira nibaza ikibazo yoba yagize kuko naramurondera no ku ngendanwa yiwe nkumva ntihita.

Bwaratamanzuye aho natanguye kubaririza ariko nza gutangazwa no kubona atashe acapa munani yabaye intere aho vyagaragara ko yanyoye izabagenzi nizabahita ndamubajije iyo yaraye amakofi niyo yanyishuye nibitutsi bitagira ukwo bingana.

Umugabo wanje yadukanye ingeso nshasha yakaborerwe no kuraraguza mu gahinga ibintu ntari narigeze ndamubonako yataha akanshikiriza ku bitutsi namakofi bitagira izina.

Nari narabwiwe ko ariko zubakwa ariko siniyumvisha buryo ki vyogera kurugero umuntu yitanga hafi kuhasiga ubuzima akora ijoro numutaga kuneza yumuryango hanyuma agahembwa guturubikwa.

Narakomeretse, nasubiza amaso inyuma nkibuka ibiguzi vyose natanze kugira nkumbure bikunde ko mba aho uwo nari narihebeye ari, nkibuka ivyo nasize inyuma nkibuka abahungu nakatiye bari bankunda kandi bari bafise ibikwegana ariko kubera nabona urukundo ruruta vyose mpitamwo kubica amazi vyose.

Ndavyibuka ingene ntari nkicipfuzza guhura numuntu anzi nabana twiganye canke abagenzi twakuranye kuko nacumitwa mu mutima namajambo buri wese yambwira duhuye bambaza ico nabaye kuko nari naronze ndahera, mu maso niminkanyari yari yaratanguye kuza.

Natanguye kwibaza nimba koko urukundo rubaho canke iryo ari rya juru rito abantu bohora baririmba kuko jewe nari mumuriro udahera nasha buri musu nkitega gutongoka nkabura.

Ndavyibuka ko kandundura yabaye igihe atahana inkumi yikizungerezi ntazi iyo yari yayikuye maze antegeka kuja kuryama muri salon jewe numwana wacu maze nawe aryamana mucumba mugitanda ku mashuka ku matera jewe ubwanje ninize ngura kugira bikunde tubane nuwo narinzi ko naremewe.

Nari narihanganiye vyinshi, nari nararwanye intambara nyinshi ndazitsindisha ukwihangana ariko uwo musu numvise ndengewe numva ntanikindi nkibereyeho kuko numvise atanguvu nkifise zo kubandanya.

Ndavyibuka ko nicaritse umwana mu ntebe maze ngenda kuri boutique ngura umuti wo kwica imbeba maze ndagaruka mvoma amazi makeya mugikombe maze nsukamwo wamuti ntora ikiyiko ndakoroga maze mu marira menshi ntangura kubwira umwana wanje yari yicaye imbere andaba nti:

“Mwananje umbabarire ngiye kugusiga kwisi yanyanse ntayanse, kera nari nkabandi naraba hejuru nkahatamarira gushika umusi so aza akambara ibaba rya kabiri nabura kugira ngo mbashe kugira mu bicu nkabandi.

Naraduze nshika mu birere vyakure hamwe hasi ntahabona ibaba rimwe riranyiyaka ndakoroka nimena hasi ndajanjagurika ubutagisubirana ncika ubunywenywe, ubu nabuze kugira mu kirere mbura no kugende hasi kuko no kunyogomba sinkibishoboye.

Rukundo rwanje, ndagusize ntakwanse niwakura ntuzonkurikize umuvumo ariko uzombabarire ndetse uzobabarire na so kuko ntazi ico akora.”

Natoye ca gikombe nshira ku munwa...

4

Narabandanije nti: “Nashize ku munwa ariko ntaramira mbanza nitegereza agakobwa kanje nza mbona karantwengeye intwengo yako yatumye mbanza ndacira hanyuma ndasubira ndiyumvira neza impamvu yo kwiyahura kwanje, niyumvira ko umuntu agomba atume niyaka ubuzima bwanje yose afise ako gaciro kose ariko nsanga ntibikwiye.

Nashize ku munzane ubuzima bwanje n’ubwiwe nta nkeka narabonye ko umunzane uhengamira ku bwanje maze ndavuga nti: “Iki ntabwo arico gihe co gutsindwa nivyho ndakomerewe ariko ndazi ibihe bikomeye birema abanyenkomezi, hamwe nokwiyahura noba mbye umunyantengenke, noba ntsinzwe imvumire kandi na nyawayo yohora yumva ko yanshoboye ikindi naco ibi vyose ntaco vyoba bimaze”

Ukwo nikwo nivyukiranije igihe umwansi yaratanguye kunyitamba ku muvyimba azi ngo yampejeje maze nanje mpagurukana inkomezi nshasha maze nambarira urugamba.

Mu buzima habaho igihe co kurira ariko ico ntawuba akwiye kugihoramwo iteka kuko ibituriza biba bihari ariko guhora turira nawo numwanzuro twifatira, nanje nafashe umwanzuro wo guhanagura amarira ngira amahirwe ingodo umugabo yayibagiriye muri salon mbonamwo amahera natoye yose maze nterura umwana wanjye turasohoka.

Inzu nari narakoze nshiramwo buri kimwe gushika uwo musi nayisohotsemwo n’umwana wanjye gusa ibindi vyose ndabisigamwo maze

nihereza inzira nagiye ntazi iyo ngiye ariko muri jewe nari niyumvamwo ko akagumye ndagasize inyuma, nari niyumvamwo intango nshasha.

Nisanze nashikiye ahantu hari imodoka ziduga mu ntara ntazi ntari bwanajemwo atanincuti kugezubwo nari bwumve ko dufiseyo ariko ndakatisha iticket nicaramwo nteganya kwururukira aho umukirirya wanyuma aza kuviramwo.

Inyuma y'urugendo rw'amasaha nagiye kwisanga muyindi ntara maze mumafaranga make nari mfise narondeye aho mpanga nakamatera nudukoresho duke twibanze ngira namahirwe nsanga ibintu vyaho ntibizimvye.

Mba ndatanguye urugendo rushasha rwo kwirwanako ariko ngira igikundiyo mubantu numwana wanje nkaronka abamundabira igihe naba naronse ibiraka gushika ndaronka nakazi mubitaro vyabigenga agafaranga karaza.

Nafashe umwanzuro wo kwisubiza ivyo nari naranyazwe nuwo nari nagabiye ivyanje vyose nawe akavyandagaza maze numva ko nkwiye kuvyiyishura ibihetangabo igihumbi.

Gushika uno musu nkorera jewe n'umwana wanje, natahuye ko atawundi muntu nkeneye kugira ngo mbeho nezerewe kuko umunezero utari hanze yanje ariko uri muri jewe nyene.

Ikindi naco nukwo urukundo rwose umuntu yogira imbere yukwo ndaruha abandi ngomba kumanza kugwiha kuko ico ntashoboye kwikorera ntanimpamvu yo kugikorera uwundi.

Narakunze ndarenza ndaba imbata kuburyo ubwenge bwanje bwari bumeze nkuburi mukaruhuko ariko iyo ni inkuru yo muri kahise kindenga gihe kuko ubu ndi murukundo na jewe nyene numwana wanjye tubayeho neza dusa neza.

James! Ya minkanyari wantukira buri musi hariyo ukimbonako? Ya magufa wansonga buri gihe harayumbonako?

James ni jewe kirezi wambaye wanka kubona ko cera ubu ndagushimira kuko wanyigishije ko atakumenya kuruta kwimenya kandi uno musi narimenye ivyo navyo ndabikesha wewe.

Ubu ndakomeye, cane mbere kuruta ukwo nigeze, ubu ntakinyiganyiza kuko igihe wankomerera wangize umunyenkomezi.”

James yari yacecetse ntanakitwe yashoboye kunyishura ahubwo Prielle yaraje maze nanje ndahaguruka ndamufata mu kiganza tuca turahaguruka turagenda twikinira numva ibisa namajwi ahamagara Jane inyuma yanje ariko sinari ndavyitayeho kuko ubu nari narahawe izina riruta ayandi ariryo **Munyenkomezi...**

IHEREZO!!!